

原书缺页

原书缺页

原书缺页

副點檢貞爲左衛將軍興國爲廣寧尹於是自太師領三省事勛以下二十人進爵增職各有差己未大赦改皇統九年爲天德元年參知政事蕭肄除名鎮南統軍李極爲尙書左丞賜左丞相秉德右丞相辯平章政事烏帶廣寧尹興國點檢忽土阿里出虎左衛將軍貞尙書省令史老僧辯父刑部尙書阿里等錢絹馬牛羊有差甲子誓太祖廟召秉德辯烏帶忽土阿里出虎興國大人賜誓券丙寅以燕京路都轉運使劉麟爲參知政事癸酉太傅領三省事蕭仲恭尙書右丞稟罷以行臺尙書左丞溫都思忠爲右丞乙亥追諡皇考太師憲古弘道文昭武烈章孝睿明皇帝廟號德宗名其故居曰興聖宮宋高麗夏賀正旦使中道遣還

二年正月辛巳以同知中京留守事蕭裕爲秘書監癸巳尊嫡母徒單氏及母大氏皆爲皇太后名徒單氏宮曰永壽大氏宮曰永寧乙巳以勵官守務農時慎刑罰揚側陋恤窮民節財用審才實七事詔中外遣侍衛親軍步軍都指揮使完顏思恭等以廢立事報諭宋高麗夏國以左丞相兼左副元帥秉德領行臺尙書省事二月戊申朔封子元壽爲崇王庚戌降前帝爲東昏王給天水郡公孫女二人月俸甲子以兵部尙書完顏元宜等充賀宋生日使戊辰羣臣上尊號曰法天膺運睿武宣文大明聖孝皇帝詔中外永壽永寧兩太后父祖贈官有差以右丞相唐括辯爲左丞相平章政事烏帶爲右丞相三月丙戌宋高

麗遣使賀卽位以弟亮爲司徒行臺尙書省以天水郡王王帶歸宋四月戊午殺太傅領三省事宗本尙書左丞相唐括辯判大宗正府事是益危殺領行臺尙書省事秉德東京留守宗懿北京留守卞及太宗子孫七十餘人周本國王宗翰子孫三十餘人諸宗室五十餘人辛酉以尙書省譯史蕭玉爲禮部尙書秘書監蕭裕爲尙書左丞司徒亮領三省事封王都元帥如故右丞相烏帶爲司空左丞相兼侍中平章政事劉咎爲尙書右丞相兼中書令左丞宗義右丞溫都思忠爲平章政事參知政事劉麟爲尙書右丞殿前左副點檢僕散忽土爲殿前都點檢五月戊子以平章行臺尙書省事右副元帥大吳爲行臺尙書右丞相元帥如故壬辰以左副元帥撒离喝爲行臺尙書左丞相元帥如故同判大宗正事宗安爲御史大夫六月丙午朔高麗遣使賀卽位甲子太廟初設四神門及四隅梁憲七月己丑司空左丞相兼侍中烏帶罷以平章政事溫都思忠爲左丞相尙書左丞蕭裕爲平章政事右丞劉麟爲左丞侍衛親軍步軍都指揮使完顏思恭爲右丞參知政事張浩丁憂起復如故戊戌夏國遣使賀卽位及受尊號八月戊申以司徒亮爲太尉領三省事都元帥如故以禮部尙書蕭裕爲參知政事九月甲午立惠妃徒單氏爲皇后十月癸卯太師領三省事最致仕辛未殺太皇太妃蕭氏及其子任王偃喝使使殺行臺左丞相左副元帥撒离喝于汴并殺平章政事宗義前工部尙書謀里野御史大夫宗安皆夷其族以魏王幹帶之

孫活里甲好脩餽亦族之十一月癸未尙書左丞相劉善罷以會寧牧徒單恭爲平章政事尙書左丞劉麟右丞完顏思恭罷以叅知政事張浩爲尙書右丞乙酉以行臺尙書左丞張通古爲尙書左丞丙戌白虹貫日丁亥以太后有稱令旨戊子以十二事戒約官吏乙丑命庶官許求次室二人百姓亦許置妾十二月癸卯朔詔去羣臣所上尊號丙午初定襲封衍聖公俸格命外官去所屬百里外者不許參謁百里內者往還不得過三日癸丑立太祖射碑于紇石烈部中上及皇后致奠于碑下甲寅野人來獻異香却之乙卯有司奏慶雲見上曰朕何德以當此自今瑞應毋得上聞若有災異當以諭朕使自警焉己未罷行臺尙書省改都元帥府爲樞密院詔改定繼絕法以右副元帥大吳爲尙書右丞相兼中書令參知行臺尙書省事張中孚爲參知政事都元帥袁爲樞密使太尉領三省事如故元帥左監軍昂爲樞密副使刑部尙書趙資福爲御史大夫

三年正月癸酉朔宋高麗夏遣使來賀乙亥參知政事蕭玉丁憂起復如故癸未立春觀擊土牛丁亥初造燈山于宮中戊子生辰宋高麗夏遣使來賀甲午初置國子監謂御史大夫趙資福曰汝等多徇私情未聞有所彈劾朕甚不取自今百官有不法者必當舉劾無憚權貴乙未上出獵宰相以下辭於近郊上駐馬戒之曰朕不惜高爵厚祿以任汝等比聞事多留滯豈汝等苟圖自安不以民事自念耶自今朕將

察其勤惰以爲賞罰其各勉之丁酉白虹貫日二月丁巳還宮三月庚寅以翰林學士劉長言等爲宋生
日使壬辰詔廣燕城建宮室己亥謂侍臣曰昨太子生日皇后獻朕一物大是珍異卿試觀之卽出諸絳
囊中乃田家稼穡圖后意太子生深宮之中不知民間稼穡之艱難故以爲獻朕甚賢之四月丙午詔遷
都燕京辛酉有司圖上燕城宮室制度營建陰陽五姓所宜海陵曰國家吉凶在德不在地使桀紂居之
雖卜善地何益使堯舜居之何用卜爲丙寅罷歲貢鷹隼沂州男子吳眞犯法當死有司以其母老疾無
侍爲請命官與養濟著爲令閏月辛未朔命尙書右丞張浩調選燕京仍諭浩無私徇丙子命大官常膳
惟進魚肉舊貢鵝鴨等悉罷之丁丑罷皇統間苑中所養禽獸歸德軍節度使阿魯補以撤官舍材木構
私第賜死戊戌詔朝官稱疾不治事者尙書省令監察御史與太醫同診視無實者坐之五月壬子以戒
敕宰相以下官詔中外戊辰宰臣請益嬪御以廣嗣續上命徒單貞語宰臣前所誅黨人諸婦人中多朕
中表親欲納之宮中平章政事蕭裕不可上不從遂納宗本子莎魯曷宗固子胡里刺胡失打秉德弟紇
里罕妻宮中六月丙子殺太府監完顏馮六宋遣使祈請山陵不許九月庚戌賜燕京役夫帛人一匹以
東京路兵馬都總管府判官蕭子敏爲高麗生日使修起居注蕭彭哥爲夏國生日使十月己巳殺蘭子
山猛安蕭拱以右副點檢不朮魯阿海等爲宋正旦使十一月癸亥詔罷世襲萬戶官前後賜姓人各復

本姓十二月戊辰杖壽寧縣主徐肇癸酉獵于近郊乙酉還宮是歲子崇王元壽薨

四年正月丁酉朔宋高麗夏遣使來賀羣臣請立皇太子從之戊戌初定東宮官屬立捕盜賞格癸卯太白經天壬子生辰宋高麗夏遣使來賀癸亥朝謁世祖太祖太宗德宗陵甲子還宮二月丁卯立子光英爲皇太子庚午詔中外甲戌如燕京昭義軍節度使蕭仲宣家奴告其主怨謗上曰仲宣之姪迪鞏阿不近以誹謗誅故敢妄懇命殺告者迪鞏阿不者蕭拱也戊子次泰州三月丙申朔以刑部尙書田秀穎等爲宋生日使四月丙寅朔有司請今歲河南北選人並赴中京銓注從之壬辰上自泰州如涼陞五月丁酉獵于立列只山甲寅賜獵士人一羊乙卯次臨潢府丁巳太白經天六月甲子朔駐綿山戊寅權楚底部猛安那野伏誅七月癸卯命崇義軍節度使烏帶之妻唐括定哥殺其夫而納之八月癸亥朔獵于途你山甲戌以待御史保魯鞫事不實杖之丙子次于鐸瓦九月甲午次中京丙午尙書右丞相大吳罷殺太府少監劉景以都水使者完顏麻潑爲高麗生日使吏部郎中蕭中立爲夏國生日使十月壬戌朔使使奉遷太廟神主御史大夫趙資福罷甲申以太子詹事張用直等爲賀宋正旦使殺太祖長公主兀魯杖罷其夫平章政事徒單恭封其侍婢忽撻爲國夫人恭之兄定哥初尙兀魯定哥死恭強納焉而不相能又與侍婢忽撻不協忽撻得幸于后遂譖于上故見殺而并罷恭十一月戊戌以咸平尹李德固爲平

章政事辛丑賈臻于烏古迪烈部及蒲與路禁百姓私相貿易仍調兩路民夫採珠一年戊申以前平章政事徒單恭爲司徒十二月甲子斬妄人敵僭于中京市辛未以汴京路都轉運使左瀛等爲賀宋正旦使庚寅太尉領三省事樞密使竟薨

貞元元年正月辛卯朔上不視朝詔有司受宋高麗夏回紇貢獻丙午生辰宋高麗夏遣使來賀以中京留守高楨爲御史大夫二月庚申上自中京如燕京三月辛亥上至燕京初備法駕甲寅親選良家子百三十餘人充後宮乙卯以遷都詔中外改元貞元改燕京爲中都府曰大興汴京爲南京中京爲北京丙辰以司徒徒單恭爲太保領三省事平章政事蕭裕爲右丞相兼中書令右丞張浩左丞張通古爲平章政事參知政事張中孚爲左丞蕭玉爲右丞平章政事李德固爲司空左宣徽使劉壽爲參知政事樞密副使昂爲樞密使工部尙書僕散師恭爲樞密副使四月辛酉以右宣徽使紇石烈撒合輦等爲宋賀生日使辛未特封唐括定哥爲貴妃戊寅皇太后大氏崩五月辛卯殺弟西京留守蒲家西京兵馬完顏謨盧瓦編修官圓福奴通進孛迭坐與蒲家善并殺之乙卯以京城隙地賜朝官及衛士六月乙丑以安國軍節度使耶律恕爲參知政事七月戊子朔元賜朝官京城隙地徵錢有差八月壬戌司空李德固薨禁中都路捕射麋兔戊寅賜營建宮室工匠及役夫帛九月丁亥朔以翰林待制謀良虎爲夏國生日使吏

部郎中察合山爲高麗生日使十月丁巳獵于哀鄉封料石岡神爲靈應王初海陵嘗過此祠持杯校禱
曰使吾有天命當得吉卜投之吉又禱曰果如所卜他日當有報否則毀爾祠宇投之又吉故封之戊午
遷宮壬戌有司言太后園陵未畢合停冬享及祫祭從之丙子命內外官聞大功以上喪止給當日假若
父母喪聽給假三日著爲令十一月丙戌朔定州獻嘉禾詔自今不得復進己丑瑤池殿成丙申以戶部
尙書蔡松年等爲賀宋正旦使戊戌左丞相耨盪溫都思忠致仕庚戌以樞密使昂爲左丞相樞密副使
僕散思恭爲樞密使十二月太白經天戊午特賜貴妃唐括定哥家奴孫梅進士及第壬戌以簽書樞密
院事南撒爲樞密副使辛未封所納皇叔曹國王宗敏妃阿懶爲昭妃丙子貴妃唐括定哥坐與舊奴姦
賜死閏月乙酉朔殺護衛特謨葛癸巳定社稷制度太白經天癸卯以太保領三省事徒單恭爲太師領
三省事如故命西京路統軍撻懶西北路招討蕭懷忠臨潢府總管馬和尙烏古邁烈司招討斜野等北
巡

二年正月甲寅朔上不豫不視朝賜宋高麗夏使就館燕庚申太白經天尙書右丞相蕭裕與前真定尹
蕭馮家奴前御史中丞蕭招折博州同知遙設等謀反伏誅詔中外己巳生辰宋高麗夏遣使來賀二月
甲申朔以平章政事張浩爲尙書右丞相兼中書令甲午以尙書右丞蕭玉爲平章政事前河南路統軍

使張暉爲尙書右丞西北路招討使蕭好胡爲樞密副使三月戊辰夏遣使賀遷都丙戌幸大興府及都轉運使司遣薦舍桃于衍慶宮五月癸丑朔日有食之避正殿勅百官勿治事己未詔自今每月上七日不奏刑名尙食進饌不進肉丁卯始置交鈔庫設使副員丁丑太原尹徒單阿里出虎伏誅復命其子朮斯刺乘傳焚其骨擲水中七月庚申初設鹽鈔香茶文引印遣庫使副丙子參知政事耶律恕罷八月丙午以左丞相昂去衣杖其弟婦命杖之戊申以御史大夫高楨爲司空御史大夫如故九月己未常武殿擊鞠令百姓縱觀辛酉以吏部尙書蕭曠爲參知政事癸亥獵于近郊丁卯次順州太師領三省事徒單恭薨是夜還宮乙亥復獵于近郊十月庚辰朔殺廣寧尹韓王亨庚寅還宮庚子以左丞相致仕溫都思忠起爲太師領三省事以刑部侍郎白彥恭等爲賀宋正旦使十一月戊辰上命諸從姊妹皆分屬諸妃出入禁中與爲淫亂臥內徧設地衣裸逐爲戲是月初置惠民局高麗遣使謝賜生日十二月乙酉以太傅溫都思忠爲太師領三省事如故平章政事張通古爲司徒平章政事如故

三年正月己酉朔宋高麗夏遣使來賀辛酉以判東京留守大吳爲太師領三省事甲子生辰宋高麗夏遣使來賀二月壬午以左丞相昂爲太尉樞密使右丞相張浩爲左丞相兼侍中樞密使僕散思恭爲右丞相兼中書令尙書左丞張中孚罷右丞張暉爲平章政事參知政事劉蕐爲左丞參知政事蕭曠爲右

丞吏部尙書蔡松年爲參知政事三月壬子以左丞相張浩平章政事張暉每見僧法寶必坐其下失大臣體各杖二十僧法寶妄自尊大杖二百乙卯命以大房山雲峯寺爲山陵建行宮其麓庚午以左司郎中李通爲賀宋生日使夏四月丁丑朔昏霧四塞日無光凡十有七日五月丁未朔日有食之癸丑南京大內火乙卯命判大宗正事京等如上京奉遷太祖太宗梓宮丙寅如大房山營山陵六月丙戌登寶昌門觀角抵百姓縱觀乙未命右丞相僕散思恭大宗正丞胡拔魯如上京奉遷山陵及迎永壽宮皇太后七月癸丑太白晝見辛酉如大房山杖提舉營造官吏部尙書耶律安禮等乙亥還宮八月壬午如大房山甲申啟土賜役夫人絹一疋是日還宮甲午遣平章政事蕭玉迎祭祖宗梓宮於廣寧乙未增置教坊人數庚子杖左宣徽使敬嗣暉同知宣徽事烏居仁及尙食官九月戊申平章政事張暉迎祭梓宮于宗州乙卯上謂宰臣及左司官曰朝廷之事尤在鎮密昨授張中孚趙慶襲官除書未到先已知之皆汝等泄之也敢復爾者殺無赦己未如大房山庚申還宮丙寅以殿前都點檢納合椿年爲參知政事丁卯上親迎梓宮及皇太后于沙流河命左右持杖二束跪太后前曰亮不孝久失溫清願痛笞之太后掖起之曰凡民有子克家猶愛之況我有子如此叱持杖者退庚午獵親射麋以薦梓宮壬申至自沙流河十月丙子皇太后至中都居壽康宮戊寅權奉安太廟神主于延聖寺致奠梓宮于東郊舉哀己卯梓宮至中

都以大安殿爲丕承殿安置壬午命省部諸司便服治事不奉死刑一月辛卯告于丕承殿乙未如敢宮冊諡永寧皇太后曰慈憲皇后丁酉大房山行宮成名曰馨寧戊戌還宮己亥以翰林學士承旨耶律歸一等爲賀來正旦使十一月乙巳朔梓宮發丕承殿戊申山陵禮成甲寅詔內外大小職官覃遷一重貞元四年租稅並與放免軍士久於屯戍不經替換者人賜絹三疋銀三兩羣臣稱賀丙辰燕百官於泰和殿丁卯奉安神主于太廟戊辰羣臣稱賀辛未獵于近郊十二月己丑還宮薦冰乙未上朝太后于壽康宮己亥太傅領三省事大吳薨親臨哭之命有司廢務及禁樂三日

正隆元年正月癸卯朔宋高麗夏遣使來賀己酉羣臣奉上尊號曰聖文神武皇帝上自九月廢朝常數月不出有急奏召左右司郎中省于臥內庚戌始視朝戊午生辰宋高麗夏遣使來賀乙丑觀角抵戲罷中書門下省以太師領三省事溫都思忠爲尙書令太尉樞密使昂爲太保右丞相僕散思恭爲太尉樞密使左丞劉薈右丞蕭曠罷參知政事蔡松年爲尙書右丞樞密副使蕭懷忠罷吏部尙書耶律安禮爲樞密副使平章政事蕭玉爲右丞相平章政事張暉罷不置平章政事官二月癸酉朔改元正隆大赦庚辰御宣華門觀迎佛賜諸寺僧絹五百疋綵五十段銀五百兩辛巳改定內外諸司印記乙未司徒張通古致仕庚子謁山陵辛丑還都三月壬寅朔始定職事官朝參等格仍罷兵衛庚申以左宣徽使敬嗣暉

等爲賀宋生日使四月太尉樞密使僕散思恭以父憂起復如故五月辛亥修容安民閣安御爲妖所憑
舞諫宮中命殺之是月頒行正隆官制六月庚辰天水郡公趙桓薨丙戌以尙書右丞蔡松年爲左丞樞
密副使耶律安禮爲右丞駙馬都尉烏古論當海爲樞密副使七月己酉命太保昂如上京奉遷始祖以
下梓宮八月丁丑如大房山行視山陵十月乙酉葬始祖以下十帝于大房山丁酉還宮閏月乙亥朔山
陵禮成羣臣稱賀甲辰回鶻使使寅朮烏籠骨來貢庚寅杖右丞相蕭玉左丞蔡松年右丞耶律安禮御
史中丞馬諷等十一月己巳朔以右司郎中梁鍤等爲賀宋正旦使癸巳禁二月八日迎佛

二年正月戊辰朔宋高麗夏遣使來賀庚辰太白晝見癸未生辰宋高麗夏遣使來賀庚寅以工部侍郎
韓錫同知宣徽院事錫不謝杖百二十奪所授官二月辛丑初定太廟時享牲牢禮儀癸卯改定親王以
下封爵等第命置局追取存亡誥身存者二品以上死者一品參酌削降公私文書但有王爵字者皆立
限毀抹雖墳墓碑志並發而毀之三月丙寅朔高麗遣使賀受尊號四月戊戌追降景宣皇帝爲遼王以
簽書宣徽院事張誥爲橫賜高麗使宿直將軍溫敦幹喝爲橫賜夏國使六月乙未參知政事納合椿年
薨以禮部尙書耶律守素等爲賀宋生日使八月癸卯始置登聞院甲寅罷上京留守司九月乙丑以宿
直將軍僕散烏里黑爲夏國生日使戊子罷護駕軍置龍翔虎步軍罷尙書省文資令史出爲外官是秋

中都山東河東蝗十月壬寅命會靈府毀舊宮殿諸大族第宅及儲慶寺仍夷其址而耕種之丁未禁賣古器入他境乙卯初鑄銅錢十二月辛未以侍衛親軍副指揮使高助不古等爲賀宋正旦使十二月己亥以侍衛親軍都指揮使紇石烈良弼爲參知政事

三年正月壬戌朔宋高麗夏遣使來賀丙寅子矧思阿不死殺太醫副使謝友正及其乳母等丁丑生辰宋高麗夏遣使來賀己卯杖右諫議大夫楊伯雄二月壬辰朔都城及京兆初置錢監甲午遣使檢視隨路金銀銅鐵冶三月辛酉朔司天奏日食候之不見命自今遇日食面奏不須頒告辛巳以兵部尙書蕭恭等爲賀宋生日使四月丙辰樞密副使烏古論當海罷以北京留守然暉爲樞密副使六月壬辰蝗入京師七月庚申封子廣陽爲滕王甲申以右丞相蕭玉爲司徒尙書左丞蔡松年爲右丞相右丞耶律安禮爲左丞參知政事紇石烈良弼爲右丞左宣徽使敬嗣暉戶部尙書李通爲參知政事九月己未太白經天甲子滕王廣陽薨庚午以宿直將軍阿魯保爲夏國生日使丁丑以教坊提點高存福爲高麗生日使辛巳遷中都屯軍一猛安於南京遣吏部尙書李惇等分地安置十月戊戌詔尙書省凡事理不當者許詣登聞檢院投狀院類奏覽訖付御史臺理問十一月辛酉以工部尙書蘇保衡等爲賀宋正旦使癸亥詔有司勤政安民癸未尙書左丞耶律安禮罷參知政事李通以憂制起復如故詔左丞相然浩參知

政事散嗣暉營建南京宮室十二月乙卯以樞密副使張暉爲尙書左丞歸德尹致仕高召和式起爲樞密副使

四年正月丙辰朔宋高麗夏遣使來賀上朝太后于壽康宮丁巳御史大夫高楨薨庚申更定私相越境法並論死辛酉罷鳳翔唐鄧穎蔡鞏洮膠西諸權場置場泗州辛未生辰宋高麗夏遣使來賀二月己丑以左宣徽使許霽爲御史大夫丁未修中都城造戰船于通州詔諭宰臣以伐宋事調諸路猛安謀克軍年二十以上五十以下者皆籍之雖親老丁多亦不許留待三月丙辰朔遣兵部尙書蕭恭經畫夏國邊界遣使分詣諸道總管府督造兵器四月辛丑命增山東路泉水畢括兩營兵士廩給庚戌詔諸路舊貯軍器並致于中都時方建宮室于南京又中都與四方所造軍器財用皆賦於民箭翎一尺至千錢村落間往往椎牛以供筋革至於烏鵲狗彘無不被害者辛亥尙書左丞張暉御史大夫許霽罷以大興尹徒單貞爲樞密副使以秘書監王可道等爲賀宋生日使八月詔諸路調馬以戶口爲差計五十六萬餘疋富室有至六十疋者仍令戶自養飼以俟己卯尙書右丞相蔡松年薨九月以翰林待制完顏達紀爲高麗生日使宿直將軍加古撻懶爲夏國生日使十月乙亥獵于近郊觀造船于通州賜尙書右丞紇石烈夏弼樞密副使徒單貞佩刀入宮十一月甲辰以翰林侍講學士施宜生等爲賀宋正旦使十二月乙卯

宋遣使告母韋氏哀甲子太白晝見乙丑以左副點檢大懷忠等爲宋弔祭使乙亥太醫使祈宰上疏諫伐宋殺之

五年正月庚辰朔宋高麗夏遣使來賀乙未生辰宋高麗夏遣使來賀二月壬子宋遣使獻母后遺留物丁卯太白晝見辛未河東陝西地震鎮戎德順軍大風壞廬舍人多壓死甲戌遣引進使高植刑部郎中海狗分道監視所獲盜賊並凌遲處死或鋸灼去皮截手足仍戒屯戍千戶謀克等後有獲者並處死總管府官亦決罰三月辛巳東海縣民張旺徐元等反遣都水監徐文步軍指揮使張弘信同知大興尹事李惟忠宿直將軍蕭阿察率舟師九百浮海討之命之曰朕意不在一邑將試舟師耳庚子以司徒判大宗正事蕭玉爲御史大夫司徒如故尙書右丞紇石烈良弼爲左丞橫海軍節度使致仕劉長言起爲右丞四月庚戌昭妃蒲察阿里忽有罪賜死甲寅宿州防禦使耶律翼使宋失體杖二百除名甲戌太白晝見六月徐文等破賊張旺徐元東海平七月辛巳詔東海縣徐元張旺誣誤者並釋之壬午以張弘信被命討賊稱疾逗遛萊州與妓樂飲燕杖之二百癸卯遣使簽諸路漢軍八月丙午朔日有食之辛亥命權貨務并印造鈔引庫起赴南京己巳樞密副使徒單貞罷以太子少保徒單永年爲樞密副使辛未謁山陵見田間穫者問其豐耗以衣賜之九月己卯還宮十月庚午遣護衛完顏普連等二十四人督捕山東